

ret sich / vnnnd treibt bey 4. Stunden Wags / durch das Ergöw hinab
 16. Mälen / vnd verliert sich wider / das niemand weiß wohin sie kom-
 men / in demselbigen / hat es vil grosse / schöne Krebs vnnnd Groppen/
 die Krebs aber / wie man sie auch siedet / werden niemahlen recht roth/
 sonderen bleibend alleweil schwarzfarbig / darumb auch die Winon
 Krebs / also gefocht / auß anderen erkant werden.

Das achtzehende Capitel.

Von dem Otter vnnnd Biber.

Litra, Litra, Lutrix, heisset bey den Italieneren / Lodere oer Lo-
 dra, bey den Frankosen Louttre, Hisp. Nutria, bey den Teütschen
 vnd Niderländeren / ein Otter / vnd bey den Engelländeren An-Otter.

Olaus, lib 18. cap. 12. es haben die Otter / ein sehr scharpff Gebiß vnd
 ein Balg wie der Biber / ist aber dremahl lenger / halt sich in den Was-
 sern des Landes Schweden / Helsingen / Rodelfaden / Angermannia /
 Jemphen vnnnd Podenland / sein Futter führet man / in grosser Zahl
 in Moscowiten vnd dänen in die Tartarey. In Schweden macht man
 sie also zam / an etlicher grossen Herren Höffe / vnd richtet sie ab / wann
 ihnen der Koch wincket / das sie dem Weyer zulauffen / vnnnd bringen
 einen Fisch / so groß / wie ihnen der Koch vorweist / darnach widerumb
 ein anderen / so lang biß es gnug ist. sein Fleisch ist alein gut / ander
 Thier damit zufangen / den Balg brauchet man vil zu dem verbremen /
 dann er stark vnnnd zäch ist / man verkaufft sie / bey dem Zimmer / wie die
 Biber / Füchs / vnnnd Marterbälz / zc. sie werden gefelcht mit Kolen /
 vnnnd mit Bäch gerauchet / da von sie ein gleiffende Schwere bekommen /
 so man aber / ein weiß Tuch darüber streicht / merckt man den Betrug
 bald / also probiert man auch die Wolffsbälz / mit einem leinenen Tuch /
 wann sie mit Kolen vnd Kryden / puluerisirt werden / aber die Behinen
 Futter probiert man mit einem schwarzen Tuch / ob sie mit Kryden be-
 sprengt seynde / oder nicht.

Albert. Georg. Agricola, vnnnd Plin. Secund. Das sie die Be-
 ter / wie etliche von ihnen außgeben / auch ins Meer sencken / haben wir